

RHOUTH

Outeur : **Onbekend**
Aan : **Israeliete**
Rede : **Oor hulle**
geskiedenis.
Geskryf tussen : **1000-1300 BCE**

Voorwoord.

Toe Naomi na haar man en seuns se dood in Moab teruggaan Betlehem toe, kom Rhouth, haar een Moabitiese skoondogter, saam Rhouth ontmoet vir Booz op sy kringland buite Betlehem en later trou hulle.

Die mooi verhaal oor Rhouth, Naomi en Booz vertel hoe 'n ou gebruik, die van die losser, in die vroeë geskiedenis van Israel toegepas is. Wanneer 'n man gesterf het, moes sy naaste manlike bloedverwant die weduwees en weeskinders onder sy sorg neem. Hy moes toesien dat hulle versorg is en dat die familiegrond wat in vreemde hande geval het, losgekoop word. Daarom is hy die losser genome. Verder verduidelik die boek ook hoe dit gekom het dat daar Moabitiese bloed in Dabid se are gevloei het, en dit ten spyte van die bepaling in 5de Mouse 23: 3 - 6.

Naomi en Rhouth Keer terug van Moab.

- 1 En in die dae toe die rigters geregeer het, was daar hongersnood in die land; daarom het 'n man uit Betlehem-Juda weggetrek om as vreemdeling te vertoef in die veld van Moab, hy en sy vrou en sy twee seuns.
- 2 En die naam van die man was Eliméleg en die naam van sy vrou Naómi en die naam van sy twee seuns Maglon en Gilon, Efratiete, uit Betlehem-Juda, en hulle het gekom in die veld van Moab en daar gebly.
- 3 En Eliméleg, die man van Naómi, het gesterwe, maar sy met haar twee seuns het oorgebly.
- 4 En hulle het vir hulle Moabitiese vroue geneem; die naam van die een was Orpa en die naam van die ander Rhouth; en hulle het daar omtrent tien jaar gebly.
- 5 En toe Maglon en Gilon altwee sterwe, en die vrou sonder haar twee seuns en haar man oorbly,
- 6 het sy haar gereedgemaak met haar skoondogters en teruggegaan uit die veld van Moab, want sy het in die veld van Moab gehoor dat IEUE op sy volk ag gegee het deur aan hulle brood te gee.
- 7 So het sy dan haar woonplek verlaat en haar twee skoondogters saam met haar. Maar toe hulle op pad was om na die land Juda terug te gaan,
- 8 sê Naómi aan haar twee skoondogters: Gaan heen, draai om, elkeen na die huis van haar moeder; mag IEUE aan julle guns bewys soos julle aan die dode en aan my bewys het.

- 9 Mag IEUE gee dat julle 'n rusplek vind, elkeen in die huis van haar man; en sy het hulle gesoen. Maar hulle het hul stem verhef en geween
- 10 en aan haar gesê: Nee, ons wil saam met u teruggaan na u volk.
- 11 Maar Naómi sê: Draai om, my dogters! Waarom sou julle met my saamgaan? Het ek nog seuns in my liggaam, dat hulle julle mans kan word?
- 12 Draai om, my dogters, gaan heen; want ek is te oud om 'n man te hê. Al sou ek sê: Ek het hoop! en nog vannag aan 'n man mag behoort en ook seuns baar—
- 13 sou julle in dié geval kan wag totdat hulle groot geword het? Sou julle in dié geval julleself opsluit om nie aan 'n man te behoort nie? Ag nee, my dogters, want dit is vir my baie bitterder as vir julle dat die hand van IEUE teen my uitgestrek is.
- 14 Toe verhef hulle hul stem en ween weer; en Orpa het haar skoonmoeder gesoen, maar Rhouth het haar aangehang.
- 15 Daarop sê sy: Kyk, jou skoonsuster het omgedraai na haar volk en na haar gode toe; draai om agter jou skoonsuster aan!
- 16 Maar Rhouth sê:

Moenie by my aandrang dat ek u moet verlaat om agter u om te draai nie; want waar u gaan, sal ek gaan; en waar u vertoef, sal ek vertoef; u volk is my volk, en u Aleim is my Aleim.

- 17 Waar u sterwe, sal ek sterwe en daar begrawe word! Mag ` so aan my doen en so daaraan toedoen—net die dood sal skeiding maak tussen my en u.
- 18 Toe sy sien dat sy vas besluit het om met haar saam te gaan, het sy opgehou om met haar te spreek.
- 19 En hulle twee het op pad gegaan totdat hulle in Betlehem gekom het. En toe hulle in Betlehem kom, het die hele stad oor hulle in opskudding geraak, en die vroue het gesê: Is dit Naómi?
- 20 Toe antwoord sy hulle: Noem my nie Naómi nie: noem my Mara, want die Almagtige het my baie bitterheid aangedoen.
- 21 Vol het ek weggetrek, maar leeg het IEUE my laat terugkom. Waarom sou julle my Naómi noem, terwyl IEUE teen my getuig het, en die Almagtige my kwaad aangedoen het?
- 22 So het Naómi dan teruggekeer en Rhouth, die Moabitiese, haar skoondogter wat saam met haar uit die veld van Moab teruggekom het; en hulle het in Betlehem gekom in die begin van die gars-oes.

Die Ontmoeting tussen Booz en Rhouth.

- 2** En Naómi het 'n bloedverwant gehad van haar man se kant, 'n vermoënde man, uit die geslag van Eliméleg, wie se naam Booz was.
- 2** En Rhouth, die Moabitiese, het vir Naómi gesê: Laat ek tog die land ingaan en are optel agter dié een in wie se oë ek genade sal vind. Toe antwoord sy haar: Gaan my dogter.
- 3** Daarop het sy heengegaan, en gekom en are opgetel op die land agter die snyers. En gelukkig kom sy op 'n stuk land af wat behoort aan Booz, uit die geslag van Eliméleg.
- 4** En Booz het juis van Betlehem af gekom en aan die snyers gesê: Mag IEUE met julle wees! En hulle het hom geantwoord: Mag IEUE u seën!
- 5** Daarop sê Booz aan sy dienaar, die opsigter oor die snyers: Van wie is hierdie jong vrou?
- 6** En die dienaar, die opsigter oor die snyers, antwoord en sê: Dit is die jong Moabitiese vrou wat saam met Naómi uit die veld van Moab teruggekom het;
- 7** en sy het gesê: Kan ek maar are optel en insamel by die gerwe agter die snyers? Sy het toe gekom en gebly van vanmôre af tot nou toe; sy het maar min daar in die huis gesit.
- 8** Toe sê Booz vir Rhouth: Luister tog, my dogter: jy moenie op 'n ander land gaan are optel nie, en jy mag ook nie hiervandaan weggaan nie; maar jy moet jou by my diensmeisies aansluit.
- 9** Met die oë op die land wat hulle afsny, moet jy agter hulle aan loop. Het ek die dienaars nie bevel gegee om jou nie aan te raak nie? En as jy dors het, gaan dan na die kanne en drink van wat die dienaars skep.
- 10** Toe val sy op haar aangesig en buig na die aarde toe en sê vir hom: Waarom het ek genade in u oë gevind, dat u in my belang stel alhoewel ek 'n vreemdeling is?
- 11** En Booz antwoord en sê vir haar: Aan my is alles omstandig vertel wat jy aan jou skoonmoeder gedoen het ná die dood van jou man, en dat jy jou vader en jou moeder en jou geboorteland verlaat het en na 'n volk getrek het wat jy gister en eergister nie geken het nie.
- 12** Mag IEUE jou daad vergelde, en mag jou loon volkome wees van IEUE, die Aleim van Israel, onder wie se vleuels jy kom skuil het.
- 13** Toe sê sy: So vind ek dan genade in u oë, my heer! Want u het my getroos en na die hart van u dienaresses gespreek, alhoewel ek nie soos een van u dienaresses is nie.
- 14** En teen etenstyd het Booz vir haar gesê: Kom hierheen en eet van die brood en steek jou stukkie in die asyn. Daarop gaan sy langs die snyers sit, en hy het haar gebraaide koring gegee, en sy het geëet en versadig geword en oorgehou.
- 15** Toe sy weer opstaan om are op te tel, het Booz sy dienaars bevel gegee en gesê: Sy mag ook tussen die gerwe optel, en julle mag haar nie beledig nie.
- 16** En julle moet ook so nou en dan vir haar uit die bondels uittrek en dit laat lê, dat sy dit kan optel; en julle mag haar nie keer nie.
- 17** En sy het op die land opgetel tot die aand; en toe sy uitslaan wat sy opgetel het, was dit omtrent 'n efa gars.

- 18** En sy het dit weggedra; en toe sy in die stad kom, sien haar skoonmoeder wat sy opgetel het; ook het sy uitgehaal en aan haar gegee wat sy oorgehou het nadat sy versadig was.
- 19** Daarop vra haar skoonmoeder haar: Waar het jy vandag opgetel, en waar het jy gewerk? Mag hy geseënd wees wat in jou belang gestel het! En sy vertel haar skoonmoeder by wie sy gewerk het, en sê: Die naam van die man by wie ek vandag gewerk het, is Booz.
- 20** En Naómi sê vir haar skoondogter: Mag hy geseënd wees deur IEUE, wat sy guns aan lewende en dode nie onttrek het nie. Verder sê Naómi vir haar: Die man is ons nabestaande, hy is een van ons lossers.
- 21** Toe sê Rhouth, die Moabitiese: Hy het ook nog vir my gesê: By my dienaars moet jy aansluit totdat hulle klaar is met die hele oes wat aan my behoort.
- 22** Daarop het Naómi haar skoondogter Rhouth geantwoord: Dit is goed, my dogter, dat jy met sy diensmeisies saam uitgaan en aan jou geen kwaad op 'n ander land aangedoen word nie.
- 23** So het sy dan by die diensmeisies van Booz aangesluit om are op te tel totdat hulle met die gars-oes en die koringoes klaar was; en sy het by haar skoonmoeder gewoon.

Booz en Rhouth is bloedverwante.

- 3** Toe sê haar skoonmoeder Naómi vir haar: My dogter, sal ek nie vir jou 'n rusplek soek, dat dit goed met jou kan gaan nie?
- 2** Nou dan, is Booz by wie se diensmeisies jy gewees het, nie ons bloedverwant nie? Kyk, hy wan vannag op die vloer gars uit.
- 3** Was jou dan en self jou en trek jou klere aan, en gaan af na die vloer toe; laat jou deur die man nie herken totdat hy klaar geëet en gedrink het nie.
- 4** Maar as hy gaan slaap, let dan op die plek waar hy gaan slaap; kom dan nader, maak sy voetenent oop en gaan lê; en hy sal jou te kenne gee wat jy moet doen.
- 5** En sy antwoord haar: Alles wat u sê, sal ek doen.
- 6** Daarop het sy afgegaan na die vloer en gedoen net soos haar skoonmoeder haar beveel het.
- 7** Nadat Booz geëet en gedrink het, en sy hart vrolik was, en hy gaan slaap het by die ent van die hoop, het sy stilletjies gekom en sy voetenent oopgemaak en gaan lê.
- 8** En die man het teen middernag geskrik en vooroor gebuig en—daar lê 'n vrou aan sy voetenent.
- 9** En hy vra: Wie is jy? Toe antwoord sy: Ek is Rhouth, u dienaress; brei dan u vleuel oor u dienaress uit, want u is die losser.
- 10** En hy sê: Geseënd is jy deur IEUE, my dogter! Jy het jou laaste liefde beter gemaak as die eerste, omdat jy nie agter jongmanne, arm of ryk, aan geloop het nie.
- 11** Wees dan nou nie bang nie, my dogter; alles wat jy sê, sal ek vir jou doen, want die hele stadspoort van my volk weet dat jy 'n deugsame vrou is.
- 12** Nou dan, dit is sekerlik waar dat ek die losser is, maar daar is nog 'n losser, nader as ek.

- 13 Bly vannag oor; en as hy jou môre wil los, goed, hy kan los; maar as hy nie lus het om jou te los nie, dan sal ék jou los, so waar as IEUE leef! Bly lê tot môre.
- 14 En sy het tot die môre aan sy voetenent bly lê. Maar nog voordat een die ander kon herken, het sy opgestaan; want hy het gesê: Dit mag nie bekend word dat die vrou op die vloer gekom het nie.
- 15 Daarna sê hy: Gee die tjalie wat jy om het, en hou dit oop. En sy het dit oopgehou, en hy het ses mate gars afgemeet en dit op haar gesit en die stad ingegaan.
- 16 Toe sy by haar skoonmoeder kom, het dié gevra: En toe, my dogter? En sy het haar alles vertel wat die man aan haar gedoen het,
- 17 en gesê: Hierdie ses mate gars het hy my gegee, want hy het gesê: Jy moet nie met leë hande by jou skoonmoeder kom nie.
- 18 En sy antwoord: Sit stil, my dogter, totdat jy weet hoe die saak uitval; want die man sal nie rus tensy hy vandag nog die saak afgehandel het nie.

Die Huwelik tussen Booz en Rhouth.

- 4 En Booz het opgegaan na die poort en daar gaan sit. En toe die lossers juis daar verbygaan van wie Booz gespreek het, sê hy: Vriend, kom nader, en sit hier! En hy het nader gekom en gaan sit.
- 2 Daarop neem hy tien man uit die oudstes van die stad en sê: Sit hier! En hulle het gaan sit.
- 3 En hy sê vir die lossers: Die stuk grond van ons broer Eliméleg wil Naómi, wat uit die veld van Moab teruggekom het, verkoop.
- 4 Nou het ek gedink, ek sal jou dit meedeel en sê: Koop dit voor die wat hier sit, en voor die oudstes van my volk; as jy wil los, los dan; maar as jy nie wil los nie, gee my te kenne, dat ek dit kan weet, want daar is niemand om te los behalwe jy nie, en ek ná jou. En hy antwoord: Ek sal los.
- 5 Daarop sê Booz: Die dag as jy die grond uit die hand van Naómi koop, dan verwerf jy tegelyk Rhouth, die Moabitiese, die vrou van die dode, om die naam van die dode in stand te hou oor sy erfdeel.
- 6 En die lossers sê: Ek kan dit nie vir my los nie, anders bederf ek my erfdeel; neem jy my lossingsreg oor, want ek kan nie los nie.
- 7 En dit was vroeër in Israel die gebruik by lossing en by ruiling om enige saak van krag te maak: die een trek sy skoene uit en gee dit aan die ander; dit was dan die bekragtiging in Israel.
- 8 Daarom het die lossers vir Booz gesê: Koop dit vir jou; en hy het sy skoene uitgetrek.
- 9 Toe sê Booz aan die oudstes en al die mense: Julle is vandag getuies dat ek alles wat aan Eliméleg en alles wat aan Gilion en Maglon behoort het, uit die hand van Naómi koop.
- 10 En ook Rhouth, die Moabitiese, die vrou van Maglon, verwerf ek vir my as vrou om die naam van die dode oor sy erfdeel in stand te hou, sodat die naam van die dode onder sy broers en uit die poort van sy woonplek nie uitgeroei word nie. Julle is vandag getuies.

- 11 Toe sê al die mense wat in die poort was, en die oudstes: Ons is getuies; mag IEUE die vrou wat in jou huis inkom, maak soos Ragel en soos Lea wat saam die huis van Israel gebou het; en verwerf mag in Éfrata en maak 'n naam in Betlehem!
- 12 En mag jou huis word soos die huis van Peres wat Tamar vir Juda gebaar het—uit die nageslag wat IEUE jou uit hierdie jong vrou sal gee!
- 13 So het Booz Rhouth dan geneem, en sy het sy vrou geword; en hy het by haar ingegaan, en IEUE het vir haar swangerskap gegee, en sy het 'n seun gebaar.
- 14 Toe sê die vroue vir Naómi: Gelooft sy IEUE wat aan jou vandag 'n lossers nie laat ontbreek het nie! En mag sy naam in Israel geroem word!
- 15 Hy sal vir jou een wees wat jou siel verkwik en jou grysheid versorg; want jou skoondogter wat jou liefhet, het hom gebaar, sy wat vir jou meer werd is as sewe seuns.
- 16 En Naómi het die kind geneem en op haar skoot gesit, en sy het sy pleegmoeder geword.
- 17 En die buurvroue het hom 'n naam gegee en gesê: Vir Naómi is 'n seun gebore! En hulle het hom genoem Obed; hy was die vader van Iessai, die vader van Dabid.
- 18 En dit is die stamboom van Peres: Peres was die vader van Hesron,
- 19 en Hesron die vader van Ram, en Ram van Amminadab,
- 20 en Amminadab van Nagson, en Nagson van Salma,
- 21 en Salmon van Booz, en Booz van Obed,
- 22 en Obed van Iessai, en Iessai van Dabid.